

RECOMPENSA PA CU CASO DI NATALEE HOLLOWAY A BIRA 200 MIL DOLLAR

ORANJESTAD(AAN): Ayera mainta na oficina di abogado de Sousa, mama di Natalee Holloway, Beth Twitty a duna un declaracion na Ingles y su abogado a hasi esaki na papiamento, cu ta bisa lo siguiente: Manera ta conoci, Srta Natalee Holloway a desaparece desde 30 di Mei 2005, sin cu algo a wordo scucha of mira di dje desde e dia ey. Autoridadnan investigativo local di Aruba ta hasiendo nan maximo esfuerzo pa hiba e caso aki na un solu-

cion. Diferente persona a woro deteni, di cual te ainda un ta cera na KIA. E autoridadnan investigativo hunto cu famia Holloway-Twitty, den un esfuerzo pa obtene cualkier informacion riba Srta Natalee Holloway y pa yuda e investigacion di e caso, awor ta ofrece recompensanan substancial na e persona cu por duna e informacion correcto. Lo tin un recompensa en efectivo di 200 mil dollar, pa e persona cu duna e informacion cu lo conduci na e

retorno sano y salvo di Srta Holloway. Pa informacion tocante su paradero, e recompansa lo ta 100 mil dollar. DIARIO a puntra colega di abogado de Sousa, Peter Mohammed, si e recompensa di 100 mil ta conta tambe pa informacion cu ta conduci na haya e curpa di Natalee, si acaso e no ta bibo mas y e abogado a confirma cu esaki lo ta e caso. Ofreciendo e recompensanan substancial, un yamada ta wordo hasi na pueblo y cualkier

persona cu tin informacion cu por wordo usa den e investigacion, pa yama e **tipline** na number **111-41-582-4000**. Mirando con delicado e caso aki ta, e persona cu duna informacion lo permanece anonimo. Pa asegura esaki, e persona cu yama e tipline, lo ricibi un codigo, cual codigo lo wordo usa den caso cu lo paga un recompensa. Prensa a puntra Sra Twitty, riba cierto remarke cu e lo a hasi den programanan Mericano, unda cu ta muestra



como si fuera e tin duda den funcionamiento di e team investigativo di Aruba. Sra Twitty a splica cu esaki no ta e mensahe cu el a duna riba e programanan Mericano y cu e tin confianza den e team investigativo, unda cu diariamente e ta haya informacion ainda, riba desaroyonan den e investigacion, di parti di polis. Prensa a puntra Sra Twitty kiko e ta pensa di e echo cu tata di Natalee, esta Dave Holloway recientemente a purba di papia cu Joran van der Sloot. El a bisa cu esaki tabata algo hopi bon y cu si un persona no tin nada di sconde, e por bin dilanti y papia libremente cu cualkier hende riba e caso aki. E mama a sigui bisa cu e ta hopi agradeci na e Park Rangers, cu a haya e cabecega na e tape, cu ta algo cu ta muestra cu berdaderamente pueblo di Aruba ta haciendo su best pa solucion e caso aki. Prensa Mericano a puntra Sra Twitty si Gobierno di Aruba a aporta na e recompensa di 200 y 100 mil, sin embargo Beth a prefera di no duna comentario riba esaki. Prensa a puntra abogado de Sousa tambe si e por confirma cu famia di Natalee a contrata investigadornan priva pa yuda cu e investigacion. E abogado a splica cu ta hopi comprensible cu un mama ta purba usa tur recurso posibel, pa haya su yiu bek y cu esaki no ta nifica cu Beth Twitty no tin confianza den autoridadnan local. E abogado a confirma si cu lo bay tin reglanan special pa e investigadornan priva y cu esaki conhuntamente cu e asunto di nan permiso di trabao aki na Aruba, ta algo cu mester wordo discuti cu autoridadnan local. Prensa local a puntra mr. de Sousa tambe con ta para cu e posibilidadnan pa cu extradicion di personanan culpable den e caso aki, unda cu e abogado a splica cu esaki por ta posibel, sin embargo ta Corte Superior lo mester bay duna conseho na Gobernador di Aruba, kende lo tin cu bay dicidi, bao di ki condicionnan e extradicion lo por tuma lugar.